

[Augsburg], 22. Dezember 1572

An Joachim Camerarius d. Ä.

BSB, Clm 10370, Nr. 307.

Clarissimo sapientia, virtute, autoritate viro, D. Ioachimo Camerario etc. Domino et amico suo colendo. Leipzig.

S. ὑπερημέρους ἡμᾶς φαίνεσθαι saepè faciunt ij, qui literas uno atque altero mense pòst reddunt, aut ne reddunt quidem. Ego tuas Septembri datas Nouembri accepi, rescribo Decembri. Sed ita sunt nostra, ut τὰ τε τῶν γραμματοφόρων, καὶ τά τῶν τυπογράφων ὀλιγωρήματα boni sint consulenda. Etsi Seceriana complexio similis est Ciceroniana, qua ille mortem aut ἀναισθησίαν, aut εὐδαιμονίαν esse asserit. Nam multa in meis lucubrationibus ita sunt deprauata, ut saepè vix, aliquando ne vix quidem, quomodo corrigenda sint, diuinare ipse possim. Valetudinem qualis qualis est feramus oportet: ἔως ἂν καθαιρεθῇ τὸ σῶμα τοῦτο τῆς ἀμαρτίας. Hic scilicet clementiss[imus] pater urit et secat, ut parcat in aeternum. Gallici et Belgici phalarismi nullus modus, nullus finis: qui utinam non et in nos tandem redundet. Pontificia factio, elata successibus, δεῖν' ἀγορευομένη, κάκ' ἐνī φρεσὶ βυσσοδομεύει: et magna est apud nostros et linguae styliquē petulantia, et licentia vitae. Interim Turcus maxima classe Italiam, cum Zephyris et hirundine prima, inuasurus dicitur. Moscouita Poloniae rex designatus, eādem opera Christianae religionis et Germaniae hostis declarabitur, ut veremur. Comitia in expectatione sunt, quae utinam ruinam minitanti reipublicae aliquid firmamenti afferant. Vt cunque erit, ἡμεῖς ἄνω βλέποντες et breuitate huius, et spe melioris vitae freti, amicitiam usque ad extrellum spiritum, summa coniunctione animorum conseruabimus. Vale. Resalutant te reuerenter Hainzelius et Fabricius. 22 Decembbris Anno 1572.

Tuae excellentiae
studiosissimus
Hieronymus Wolfius.